

## **Dithero tsa Tirelano mo Kutlwanong**

05/2015 Thero ka moletlo wa go gopola botsalo jwa Morena, e le ka 25. 12. 2014

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang moletlo ono le kwadilweng mo go Joh. 1:14a, le re: "Lefoko leo la nna nama, la aga mo go rona, ra ba ra bona kgalalelo mo go lone."

1. Sefela sa 51 - 51/58

2. Thapelo: Modimo, Rara yo o mo legodimong, re a leboga, Motlhodi le Mmoloki wa rona, gonne o romile Morwao mo lefatsheng gore a re golole mo losong lo lo sa khutleng, mo maleong, le mo thateng ya ga Satane. Jesu Keresete, re a leboga, gonne o tsetswe kwa Betleheme, wa fologa kwa legodimong gore re pholosiwe ka bopelothomogi jo bogolo jwa gago. Mowa o o Boitshepo, re kopa le kajeno mo moletlong o mogolo o gore o re goge mo boammaaruring jwa gago, o re bolokele mo tumelong ya nnete. O re tsoseletse gore re bone neo e kgolo e ya botsalo jwa ga Jesu Keresete. Tseo re a di kopa ka ene Mopholosi wa rona. Amen.

- 3. Lefoko la Testamente e kgologolo le kwadilwe mo go Mika 5:1-5a;
  - Epistolo ka fa thulaganyong ya 2 e kwadilwe mo go Tito 3:4-7;
  - Efangele ka fa thulaganyong ya 5 e kwadilwe mo go Johane 3:31-36.

4. A go ipolelwe tumelo ya bokeresete!

5. Sefela sa 52 - 52/60

6. Thapelo ya mmadi wa thero.

7. Efangele ka fa thulaganyong ya 1 e ntšhwa e kwadilwe mo go Luka 2:1-20, e re: "E rile mo malatsing ao ga tswa taolo kwa go Kaisara Auguseto gore lefatshe lotlhe le kwalwe. Go kwalwa moo ga ntlha go dirilwe, fa Kirenio a le molaodi wa Siria. Botlhe ba ya go kwalwa, mongwe le mongwe a ya kwa motseng wa ga gabo. Josefa le ene a tswa kwa Galelea mo motseng wa Nasareth, a tthatlogela kwa Jutea kwa motseng wa ga Dafita o o bidiwang Betleheme, ka a le wa kgotla yooro Dafita; a ya go kwalwa le Maria, mosadi yo a mmeetseng, a le moimana. Ya re ba le koo, ga fitlha malatsi a o tla belegang ka ona, a ba a belega morwawe wa ntlha, a mo phutha ka masela, a mo latsa mo segopong sa dipitse; ka gonne ba ne ba se na bonno mo ntlong ya baeti. Go ne go le badisa mo lefatsheng leo, ba le kwa nageng, ba tlhokometse letsomane la bone bosigo. Mme moengele wa Morena a ema fa go bone, le kgalalelo ya Morena ya bonega dintlheng tsotlhe tsa bone; mme ba boifa ka poifo e kgolo. Moengele a ba raya a re: 'Se boifeng; gonne bonang, ke lo tsiseditse mafoko a a molemo a boitumelo jo bogolo jo e tla nnang jwa batho botlhe; ka gonne gompieno lo tsaletswe Mogolodi mo motseng wa ga Dafita, yo e leng Keresete Morena. Mme se e tla nnang sesupo mo

go lona ke se: Lo tla fitlhela lesea le phuthilwe ka masela, le letse mo segopong sa dipitse.' Ka tshoganyetso bontsi jwa masomo a legodimo jwa nna le moengele, jwa baka Modimo jwa re: 'Tlotlo a e nne ya Modimo kwa magodimong le kagiso mo lefatsheng mo bathong ba o ba itumelelang.' Ya re baengele ba sena go ba tlogela ba ya legodimong, badisa ba raana ba re: 'A re yeng tlhe kwa Betleheme, re bone selo se, se se dirafetseng, se Morena o se re itsisitseng.' Ba ya ka bonako, ba fitlhela Maria le Josefa le lesea le letse mo segopong sa dipitse. Ya re ba sena go bona, ba bega lefoko le ba le boleletsweng ka ga ngwana yo. Mme botlhe ba ba utlwang ba gakgamalela tse ba di boleletsweng ke badisa. Maria a boloka dipolelo tsotlhe tseo, a di akanya mo pelong ya gagwe. Jaanong badisa ba bowa, ba galaletsa Modimo, ba o boka ka ntlha ya tsotlhe tse ba di utlwileng le tse ba di bonyeng, fela jaaka ba ne ba boleletswe." Amen.

8. Thero: Barategi mo Moreneng wa rona Jesu Keresete. Ga go tlhokege go bua jalo, mme ke a go bolela: Kajeno ke moletlo o mogolo thata mo lefatsheng lotlhe. Ka gongwe re ka re: Ke moletlo wa meletlo. Batho ba le bantsi thata ba a itumela, ba a thaba, ba opela kajeno difela tse dintle tsa moletlo o montle o, ba baka Modimo. Re gopola kajeno botsalo jwa Morwaa-Modimo jwa kwa Betleheme. Re leboga Modimo mmogo le badumedi botlhe, gonne o romile Morwaaona, wa mo romela mo lefatsheng gore e nne Mogolodi wa rona, a re golole mo losong lo lo sa khutleng, a re busetse mo legaeng le le sa khutleng mo go Rraagwe, kwa go Rara, Motlhodi le Mmoloki wa rona. Ra tshaba, le go kgojwa teng koo, mme Modimo o re setse morago go re senka, le go re busetsa teng kwa legodimong. Ka moo re itumela kajeno go utlwa ka ga lorato lwa Modimo go rona ba re leng bana ba ona. Re itumela go utlwa molaetsa o montle o wa boitumelo jo bogolo. "Ngwana re mo tsaletswe. Morwa re mo neilwe, puso e tla nna mo legetleng la gagwe, o tla bidiwa Mogakolodi yo o gakgamatsang, Modimo o o thata, Rara yo o sa khutleng, Kgosi ya kagiso. Opelelang Morena sefela se sešwa, gonne o dirile dilo tse di gakgamatsng." Ka mafoko ao a sefela sa go tsena mo tirelong -Modimo diphuthego tse dintsi tsa Balutere ba simolola go direla Morena wa barena, Jesu Keresete, Mopholosi wa rona.

Barategi mo Moreneng wa rona Jesu Keresete, kgang eo ya Keresemose e simolotse mo tshimong ya Etene, mo Parateiseng ka nako, fa batho ba ntlha ba ne ba wela mo boleong ka go sa utlwe Modimo, ka go tlola taolo ya ona. Ke nnete, batho ba ntlha ba tsentse loso mo lefatsheng. Ka ntlha ya tlhago ya bone e e senyegielng batho ga ba kgone go ipholosa, ba na le pelo e e sa utlweng ditaolo tsa Motlhodi wa bone, batho botlhe ba tlhamaletse go ya mo losong, gonne botlhe ba leofile, botlhe ke baleofi. Re

dikokomane tsa ga Atame. Bokhutlo jwa rona mono mo lefatsheng ke loso, mme Modimo ga o batle loso lwa batho ba ona, e seng foo fa a ne a ba bopa, le e seng kajeno, ga o batle loso lwa rona. O rata gore re tshele, re phologe. O rata go tshela le rona mo pusong ya ona go ya bosakhutleng. Wa solofetsa batsadi ba ntlha ba rona, e bong Atame le Efa, gore ba tla tsalelwa Mopholosi. Wa solofetsa Aborahame, Rra-bontsi, Mopholosi. Wa solofetsa Dafita, kgosi ya Baiseraele Mopholosi yo o tla tlang mo lefatsheng go golola batho ba ba merafe yotlhe mo maleong a bone, mo thateng ya ga Satane, le mo losong lo lo sa khutleng. Botlhe ba lalediwa go amogela pholoso e e mo go Morwa Modimo ka go dumela mo go ene, le go kolobediwa mo leineng la Modimo o o Borarobongwe. Ke gona rona, bana ba Modimo ba kajeno, re itseng Mopholosi yo. Ke Jesu Keresete yo re mo tsaletsweng kwa Betleheme. Re dumela mo go ene, fa e le Mopholosi wa rona. Re opela kajeno, re re: Atame o tlodile Lefoko la Morena mo Parateiseng. Morena ga a ka a mo latlha, a mo solofetsa Mopholosi. Jaanong o tlile, a ineela mo go rona. Re itse Morwa Modimo, Morwa Maria yo re mo tsaletsweng kwa Betleheme. Ga re lebelele yo mongwe, mme re dumela mo go ene Jesu Keresete, fa e le Mopholosi wa baleofi. Ka boipolelo jwa kereke ya Lutere re ipolela boammaaruri jo bo reng: "Go tloga ka go wa ga Atame batho botlhe ba ba tsalwang ka fa tthagong ya motho ba amogelwa mo boleong, le go tsalelwa mo go jona. Ke gore go tswa sebopeelong botlhe ba tletse dikeletso le dikakanyo tse di bosula. Ka fa tthagong ya bone ga ba kgone go boifa Modimo ka tshwanelo, le e seng go dumela ka tumelo e e siameng. Le gona go a rutiwa gore bolwetse jo, e bong boleo jwa tllhago, ke boleo ruri, bo atllholela botlhe tatllhego, bo ba tsetsa loso lo lo sa khutleng le lwa sebaka se le bogale jwa Modimo jo bo sa khutleng, fa ba sa tsalwe sešwa ka kolobetso le ka Mowa o o Boitshepo." Ka boipolelo jwa rona re bona tatllhego ya rona, mme Modimo o re neile Morwaaona. Jesu Keresete o tsetswe teng kwa Betleheme. Ga a ka a tsalwa ka fa tthagong jaaka rona, mme a tsalwa ke Maria wa lekgarebe ka thata ya Modimo Mowa o o Boitshepo, a tsalwa a se na boleo jwa tllhago, a tsalwa a se na boleo bope. A tla mo lefatsheng go sikara maleo a rona, ene yo o se nang boleo, le e seng bo le bongwe fela.

A re se ka ra nyata moletlo o mogolo o, re se o fetole go nna moletlo wa go ja le go nwa fela, mme re tlhokomele sentle tsotlhe tse re di diretswang ke Morena wa rona, re mo direle, re mo tumise, re mo utlwe ka fa go tshwanetseng ka teng. Efangele ya Keresemose e re ruta tirelo ya Modimo ka mokgwa o montle, re o utlwa jaaka Josefa le Maria, re itumele mmogo le badisa ba kwa Betleheme, re thabe mmogo le baengele, re tumise Modimo, re bake mmogo le bone, re re: "Tlotlo a e nne ya

Modimo kwa magodimong!” Re o leboge mmogo le bana botlhe ba ona ba ba dumelang mo go Jesu, gonne ke yo o re tlišeditšeng kagiso le boikhutso, re tsamaye go mmona kwa a leng teng kajeno jaaka badisa ba nako ele kwa Betleheme. Re tsamaye, re ye mo tireleng ya gagwe, re utlwe Lefoko la gagwe, re je mmele wa gagwe, re nwe madi a gagwe mo selalelong sa gagwe, re bone gore kwa Efangele ya ga Keresete e tsenang teng mono mo lefatšheng lefifi le a tloga, lesedi le le bonesang lefifi la felo fa. Lefifi ga le nne kwa lesedi le leng teng. Lesedi le kgarametsa lefifi kwa ntle. Jesu Keresete, yo e leng Modimo ruri, ke lesedi la lefatše, o busetsa lesedi le boitumelo jwa nnete mo go rona ba re ntseng mo lefifing. Kajeno re gopola moletlo o wa lesedi. Jesu Keresete a goroga mo lefatšheng go tlišetsa lesedi le kagiso mo go rona ba re tšetsweng re le mo lefifing.

A re lebogeng Modimo Rara yo o mo legodimong mo botshelong jotlhe jwa rona, re o leboge mo moletlong o mogolo wa Keresemose, gonne o re rata mo go kalo. A re mo lebogeng, go ya bosakhutleng. Amen.

9. Thapelo: Rara yo o mo legodimong, re a go leboga, gonne o re ratile mo go kalo, wa roma Morwao, wa mo romela mo go rona mono mo lefatšheng gore a re pholose. Re kopa le kajeno Mowa o o Boitshepo gore o re tšoseletse, o re abele, o tiise tumelo ka metlha go dumela mo go wena, re se latlhege, mme re go ikanye ka metlha, re bone moletlo o mogolo o wa gago, re bone tiro ya ga Morwao, re bone, re lebogele bopelotlhomogi jwa gago. Tseo re di kopa ka Jesu Keresete Morena Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 53 - 53/56

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber, ka ngwaga wa 2008/ 2014.

Kgatiso le go rongwa ga dithero tseo go tšhegediwa ke kopano e e bidiwang The Lutheran Heritage Foundation.